

Disposición derradeira segunda. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 5 de marzo de 2007.—A ministra de Sanidade e Consumo, Elena Salgado Méndez.

MINISTERIO DE XUSTIZA

4942 *REAL DECRETO 170/2007, do 9 de febreiro, polo que se modifica o Regulamento do Rexistro Civil, aprobado polo Decreto do 14 de novembro de 1958. («BOE» 59, do 9-3-2007.)*

A renovación legislativa que se está a producir nos últimos tempos no ámbito do dereito de familia determina a necesidade de adaptar a normativa do Rexistro Civil a tales cambios. En particular, o obxectivo desta modificación regulamentaria estriba en lograr a adecuada coordinación do Regulamento do Rexistro Civil coa Lei orgánica 1/2004, do 28 de decembro, de medidas de protección integral contra a violencia de xénero, cuxa disposición adicional vixésima modificou a alínea segunda do artigo 58 da Lei do Rexistro Civil en materia de cambio de apelidos, e coa Lei 15/2005, do 8 de xullo, pola que se modifican o Código Civil e a Lei de axuízamento civil en materia de separación e divorcio.

En canto á primeira das adaptacións citadas, hai que recordar que a alínea primeira do artigo 208 do Regulamento do Rexistro Civil, aprobado polo Decreto do 14 de novembro de 1958, en concordancia co previsto pola alínea primeira do artigo 58 da Lei do Rexistro Civil, dispón que «non será necesario que concorra o primeiro requisito do artigo 205 para cambiar ou modificar un apelido contrario ao decoro ou que ocasione graves inconvenientes ou para evitar a desaparición dun apelido español. Enténdese que un apelido ocasiona graves inconvenientes cando for estranxeiro ou, por calquera razón, leve consigo deshonra».

Os requisitos a que alude o citado artigo 205 do Regulamento do Rexistro Civil son os seguintes: 1.º Que o apelido na forma proposta constitúa unha situación de feito non creada polo interesado; 2.º Que o apelido ou apelidos que se traten de unir ou modificar pertencen llexítimamente ao petionario; 3.º Que os dous apelidos que resulten do cambio non proveñan da mesma liña.

A alínea segunda do artigo 208 do Regulamento do Rexistro Civil, pola súa parte, en correspondencia coa alínea segunda do artigo 58 da Lei do Rexistro Civil, establece a posibilidade de facer excepción da existencia de tales requisitos para efectos de autorizar un cambio de apelidos en supostos excepcionais, nos seguintes termos: «Cando se dean circunstancias excepcionais, e a pesar de faltaren os requisitos que sinala o citado artigo, poderase acceder ao cambio por decreto por proposta do Ministerio de Xustiza, con audiencia do Consello de Estado. En todos estes casos a oposición pode fundarse en calquera motivo razoable».

En consecuencia, todos os requisitos do artigo 205 do Regulamento do Rexistro Civil son dispensables cando concorran no caso concreto «circunstancias excepcionais», quedando a apreciación destas suxeita á discrecionalidade non do Ministerio de Xustiza, a quen neste caso corresponde só a facultade de iniciativa ou proposta pero non a de resolución, senón do Goberno, mediante real decreto e logo de audiencia do Consello de Estado.

É lóxico que o exercicio discrecional dunha potestade administrativa como a de dispensa para casos singulares dos requisitos establecidos con carácter xeral pola regulación legal do cambio de apelidos se rodee das máximas cautelas de procedemento e de competencia do órgano facultado para tal exercicio, evitando na medida do posible que o obxectivo de salvaguardar determinados intereses ou dereitos particulares en supostos excepcionais poida derivar en situacións de discriminación ou de vulneracións do principio de igualdade xurídica dos cidadáns.

A casuística da xenérica expresión utilizada polo artigo 208 do Regulamento do Rexistro Civil de «circunstancias excepcionais» pode abranguer casos en que a excepcionalidade veña acompañada pola urxencia e perentoriedade da súa apreciación por afectar á protección de dereitos fundamentais básicos como a vida ou integridade física da persoa afectada. Este é o caso en que se poden encontrar aquelas persoas, especialmente no caso das mulleres, que ven ameazada a súa seguridade persoal polo acoso moral ou físico que sofren no marco da violencia doméstica ou de xénero. Nestes casos a autorización do cambio dos apelidos de tales persoas, e eventualmente dos fillos que se encontren baixo a súa custodia e sometidos á mesma ameaza, pode representar un instrumento xurídico de protección útil como complemento a eventuais ordes xudiciais de afastamento ou outras medidas cautelares na medida en que dificulta a localización da vítima polo presunto agresor.

Agora ben, esta medida de protección pode devir totalmente ineficaz por consecuencia do desfase entre a perentoriedade da situación de risco, e a conseguinte necesidade de protección, e a existencia da tramitación previa do complexo procedemento previsto polo artigo 208 do Regulamento do Rexistro Civil que require a proposta previa do Ministerio de Xustiza, audiencia do Consello de Estado e a posterior aprobación dun real decreto por parte do Goberno.

Por isto, a Lei orgánica 1/2004, do 28 de decembro, de medidas de protección integral contra a violencia de xénero, deulle nova redacción á alínea segunda do artigo 58 da Lei do Rexistro Civil, antes transcrita, agregando ao seu anterior contido o seguinte texto: «En caso de que o solicitante da autorización do cambio dos seus apelidos sexa obxecto de violencia de xénero e en calquera outro suposto en que a urxencia da situación así o requira, poderá accederse ao cambio por orde do Ministerio de Xustiza, nos termos fixados polo regulamento».

A presente reforma, neste ámbito, ten por obxecto precisamente dotar do necesario desenvolvemento regulamentario a anterior previsión legal, facendo esta operativa. De conformidade co obxectivo da lei, a actual reforma persegue simplificar o procedemento de autorización de cambio de apelidos nos supostos indicados, coonestando a axilización deste coa urxencia da protección demandada pola vítima. Todo isto sen prexuízo de que en casos de simulación ou fraude se poida anular ou revogar a autorización do cambio dos apelidos a través das correspondentes accións e recursos.

II

Por outra parte, esta reforma regulamentaria persegue un segundo obxectivo que é o de acomodar o Regulamento do Rexistro Civil ás modificacións introducidas pola citada Lei 15/2005, do 8 de xullo, de modificación do Código civil en materia de separación e divorcio. Así, resulta necesario acometer a reforma do actual artigo 263 do Regulamento do Rexistro Civil para adaptalo ás exigencias que impón a nova concepción da separación ou divorcio sen causa e sen culpa de ningún dos esposos. Esta nova concepción destas institucións resulta incompatible coa redacción actual do citado precepto regulamentario, no cal se prevé que «As inscri-

cións das resolucións xudiciais precisarán o seu alcance e causa do divorcio, nulidade ou separación, a boa ou mala fe dos cónxuxes e as determinacións sobre patria potestade e coidado dos fillos», incompatibilidade que se cinxe ás mencións obrigatorias da causa do divorcio ou separación e á boa ou mala fe dos cónxuxes que, desaparecidas da lei civil, deben desaparecer tamén da regulamentación rexistral, en aplicación dos principios de xerarquía normativa e de concordancia do rexistro coa realidade extrarrexistral.

A reforma débese completar, pola mesma motivación antes expresada, coa supresión da referencia que ás causas da separación ou divorcio dun matrimonio se conteñen no artigo 21 do Regulamento do Rexistro Civil ao enumerar os distintos supostos de publicidade restrinxida, sometidas a autorización especial. En correspondencia cos cambios que se introducen neste precepto, modifícase tamén o artigo 22 de Regulamento do Rexistro Civil.

Na súa virtude, por proposta do ministro de Xustiza, de acordo co Consello de Estado, e logo de deliberación do Consello de Ministros na súa reunión do día 9 de febreiro de 2007,

DISPÓN O:

Artigo único. *Modificación do Regulamento do Rexistro Civil, aprobado polo Decreto do 14 de novembro de 1958.*

O Regulamento do Rexistro Civil, aprobado polo Decreto do 14 de novembro de 1958, modifícase nos seguintes termos:

Un. Modifícanse os números 1.º e 3.º e engádese un novo número 6.º ao artigo 21 coa seguinte redacción:

«1.º Da filiación adoptiva ou descoñecida ou de circunstancias que descubran tal carácter e do cambio do apelido Expósito ou outros análogos ou inconvenientes.»

«3.º Das causas de privación ou suspensión da patria potestade.»

«6.º Dos cambios de apelido autorizados conforme o previsto na alínea terceira do artigo 208 deste regulamento.»

Dous. Modifícase o número 3.º e engádese un novo número 6.º ao artigo 22 coa seguinte redacción:

«3.º Respecto das causas de privación ou suspensión da patria potestade, o suxeito a esta ou os seus ascendentes ou descendentes ou herdeiros.»

«6.º Respecto dos cambios de apelido autorizados conforme o previsto na alínea terceira do artigo 208, unicamente a persoa inscrita.»

Tres. O artigo 208 queda redactado nos seguintes termos:

«Non será necesario que concorra o primeiro requisito do artigo 205 para cambiar ou modificar un apelido contrario ao decoro ou que ocasione graves inconvenientes ou para evitar a desaparición dun apelido español. Enténdese que un apelido ocasiona graves inconvenientes cando, por calquera razón, leve consigo deshonra.

Cando se dean circunstancias excepcionais, e a pesar de faltaren os requisitos que sinala o citado artigo, poderase acceder ao cambio por real decreto por proposta do Ministerio de Xustiza, con audiencia do Consello de Estado.

En caso de que o solicitante da autorización do cambio dos seus apelidos sexa obxecto de violencia de xénero, poderase acceder ao cambio por orde do ministro de Xustiza. Para iso deberase acreditar que quen alegue ser obxecto de violencia de xénero obtivo

algunha medida cautelar de protección xudicial no citado ámbito. Tamén se poderá acceder ao cambio de apelidos na mesma forma en calquera suposto en que a urxencia da situación así o requira.

A orde ministerial a que se refire o parágrafo anterior non será obxecto de publicación no Boletín Oficial del Estado nin en calquera outro medio.

En todos estes casos a oposición pódese fundar en calquera motivo razoable.

O disposto neste artigo enténdese sen prexuízo do exercicio das accións que poidan proceder unha vez concedida a autorización do cambio e, en particular, en caso de que se aprecie con posteridade á autorización do cambio a existencia de simulación ou fraude por parte do solicitante.»

Catro. A primeira alínea do artigo 263 do Regulamento do Rexistro Civil queda redactada do seguinte modo:

«As inscricións das resolucións xudiciais precisarán o seu alcance e as determinacións sobre patria potestade e coidado dos fillos.»

Disposición derradeira primeira. *Título competencial.*

Este real decreto dítase ao abeiro da competencia exclusiva estatal en materia de ordenación dos rexistros e instrumentos públicos, prevista polo artigo 149.1.8.ª da Constitución.

Disposición derradeira segunda. *Habilitación de desenvolvemento e execución.*

O ministro de Xustiza poderá ditar cantas disposicións de desenvolvemento sexan necesarias para a execución deste real decreto.

Disposición derradeira terceira. *Entrada en vigor.*

O presente real decreto entrará en vigor o día seguinte ao da súa publicación no Boletín Oficial del Estado.

Dado en Madrid o 9 de febreiro de 2007.

JUAN CARLOS R.

O ministro de Xustiza,
JUAN FERNANDO LÓPEZ AGUILAR

MINISTERIO DA PRESIDENCIA

5044 *ORDE PRE/532/2007, do 9 de marzo, pola que se modifica a Orde PRE/174/2007, do 31 de xaneiro, pola que se actualizan as instrucións técnicas complementarias números 8, 15, 19 e 23 do Regulamento de explosivos, aprobado polo Real decreto 230/1998, do 16 de febreiro. («BOE» 60, do 10-3-2007.)*

A Orde PRE/174/2007, do 31 de xaneiro, establece determinadas limitacións para a subministración e o uso de artificios pirotécnicos, por razóns de idade, en función da clase destes. Estas limitacións están baseadas na transcripción do texto da Directiva do Parlamento Europeo e do Consello para o establecemento do mercado de artigos pirotécnicos.